

保定府志

第三十二冊 卷七十八 卷七十九
仙釋 軼事 補遺

保定府志卷七

雜記二

仙釋

黃伯陽修道藥簞山朝陽洞有石龍石虎八卦團瓢天花版
至心石煉丹爐上堂水下堂水諸勝境又一洞有肝花石及藥
籃石遺蹟堂水潮汐有信洞甚暗然人間將署發黑時洞中明

白可睹

安肅縣志

按安肅縣有藥籃山蓋因是得名俗作藥欄誤

張道陵不知何時人有仙術趙升從之學一日與諸弟子遊大
茂山雲臺絕巖有大桃樹下臨不測陵白得此者向汝此道升
遂投下著樹取桃滿懷不得上陵以手援之乃還

舊志

葛洪字稚川丹陽句容人好仙晉咸甯初以勾漏出丹砂求爲

令乃於羅浮山煉丹後又隱於唐縣楊家峪久之尸解去

同上

黃野人葛洪弟子隨洪至羅浮結廬於沖虛觀側時有啞虎守之洪既仙去留丹於柱石間野人自外至得一粒服之爲地行仙常有詩云雲來萬嶺動雲去天一色長嘯兩三聲空山秋月白相傳在葛山導引胎息有年忽遊而不返後見之白雲峯下蟬脫端坐宛然今其象與詩在焉

唐縣志

顓頊和高陽氏之裔也稱大元女少喪夫有術人相其母子俱不壽乃學道術能入水不濡當盛寒單衣臥冰而色不變身體溫暖能徙官府宮殿城市及世人屋舍於他處視之無異指之則還所在一日與弟子行山間日暮以杖扣山石石開皆有門戶入其中有屋室床几帷帳廚廩酒食如常雖行萬里無異行三十六術甚有神效起死無數不見其修煉服食顏色益少鬢

髮如鴉忽白日昇天去

高陽縣志

富山高陽人父霸爲藍田令富少孤居貧而篤學無厭採薪爲燭以照讀書及至冠年備盡經史美姿容善談論後遇爲秦衛將軍楊邕資其衣糧習鑿齒攜共志學及聽安公講放光經遂有心樂道於是剃髮依安受業安亡後還魏郡廷尉寺下帷潛思絕世人間時村人有劫劫得一小兒欲取心肝以解神富道遙路口遇見劫具問其意因脫衣以易小兒羣劫不許富曰夫入五臟亦可用否劫謂富不能忘身因妄言亦好富乃念曰我幻燄之軀會有一死今以濟人雖死猶生卽自取劫刀畫胸至臍羣劫更相咎責四散奔走卽送小兒還其家行路一人見富如此因問其故富雖復頓悶口猶能言迺具答以此事此人悲悼傷心還家取針縫其腹皮塗以驗藥輦還寺息少時而差後

不知所終

高陽縣志

道慎高陽人十四出家入洛從光師學於地論後稟上統而志涅槃性度虛簡風量陶然綱網門徒維攝大法爲己任每參說戒宣帝請爲國都綏撫遺法得無虧緒禪匠僧達論士法靈皆伏其辨對終於鄴城定國寺春秋六十有五

高陽縣志

道雄道體俱高陽人與趙郡道獻明則等共標風望隋大業間京兆靜琳師在明輪妙象諸寺講揚攝論而雄等並相參的於時語云釋門威鳳智海明珠咸承理味的以華實

高陽縣志

曇選高陽人博通經術以涅槃著名護法爲慮晚住并部興國寺州奉之酬問往還以擊節爲要吐言開合宏放終古楊諒逆節繕造牟甲以興國寺爲甲坊楊素敗之官軍入郭搜求逆黨總集諸僧責供反者選時在眾乃出對曰比佛法陵遲特由僧

無有德可以動俗致有亂階結聚不能誨以忠信此誠如公所
教今被理責陷身無地素乃舒顏曰僧等且還留向對僧擬論
機務煬帝下勅通被放免合眾獲安大業末兵饑交接四方僧
遊寄食無地選每日拄杖在門驅逐防者攜引羈僧供給鉢器
遂至食堂眾多子弟不敢違逆許選停客房內廊然唯置大鎗
一口每日引諸乞兒所得食總入鎗中雜爲饘粥便行坐乞人
手自斟酌選亦依行受粥而食遂及有年武德八年遘疾淹積
乃尸臥引衣申脚潛息久之不覺已逝時年九十有五送於西

山之陰

高陽
縣志

曇榮定州九門人源南鄧而分派因封居高陽年十九爲書生
刻意元理寄心無地因靈裕法師講華嚴經試聽之便徹悟元
範略其詮致乃投裕爲師及受具後專業律宗經餘六載榮形

解雄窳稱病設方諸有餐飲咸歆至澤禮供曰隆投造填委每
年春秋立方等般舟秋冬各興坐禪念誦武德九年夏於潞城
文障村立法行道貞觀七年清信士常疑保等請榮於州治法
住寺行方等悔法沙門僧定者戒行精固於道場內見大光明
五色間起從上而下中有七佛相好非常貞觀十三年十二月
終於法住寺春秋八十有五殯於野外後門徒出其遺骨葬於

寺南建塔表之

高陽縣志

顓頊先生顓頊之後也得道於中岳唐劉滄贈詩云浩氣含眞
玉片輝著書精義入元微洛陽紫陌幾曾醉少室白雲時一歸
松雪月高惟鶴宿煙嵐秋霽到人稀知君濟世有長策莫問滄
浪有釣磯又張喬寄詩云先生顓頊後得道言何人松柏卑於
壽兒孫老卻身夜窗峰頂曙寒澗洞中春戀此逍遙景雲間不

可侵同上

許碯自稱高陽人少爲進士累舉不第晚學道於王屋山周遊五岳名山洞府後從峨眉山經兩京復自襄汴來抵江淮茅山天臺四明仙都委羽武彝霍桐羅浮無不遍歷到處皆於石崖峭壁人不及處題云許碯自峨眉山尋偃月子到此覩筆蹤者莫不歎其神異竟莫詳偃月子何人後多遊廬江間嘗醉吟曰閨院花前是醉鄉踏翻王母九霞觴羣仙拍手嫌輕薄謫向人間作酒狂好事者或詰之曰我天僊也方在崑崙就宴失儀見謫人皆笑之以爲風狂後當春景插花滿頭把花作舞上酒家樓醉歌昇雲飛去

高陽縣志

曇韻不知氏族高陽人初厭世出家誦法華經餘兩卷時年十九仍投恆岳側蒲吾山就彼虛靜訖此經部值栖隱禪師曰誦

經非不道緣常誦未卽至道要在觀心離念方契正道耳韻初承此告謹卽受而行之又聞五臺山者卽華嚴經清涼山也世傳文殊師利常所住處古來諸僧多人祈請有感見者具蒙六教昔元魏孝文嘗於中臺東南下三十里大孚靈鷲置大布寺帝曾遊止具奉聖儀前種花園地方二頃夏中發豔狀同鋪錦遂足栖焉遍遊臺岳備見靈相初停北臺木瓜寺二十餘歲單身隻影處以瓦窯形覆弊衣地布草蓐此山寒厲林生澗谷韻夜行晝坐慶其晚逢也前所誦經三十餘載會隙厯試一字無遺至仁壽年內有瓚禪師者結集定學背負繩床在雁門川中蘭若爲業韻居山日久思展往懷聞風附道便從瓚眾一沐清化屬隋高祖造寺偏重禪門延瓚入京韻遂投於比于山又遊南部離石龍泉文成等郡原此河濱無受戒法縱有志奉皆往

太原及韻化行卽傳斯教山城兩眾皆蒙具足唐運伊始兵接
定陽幽栖積久衣服故弊蚤蠹聚結曾不棄捐任其味敢寄以
調伏曾以夏坐山饒土蚤旣不屏除氈如凝血如此行施四十
餘年常願寫法華誓願潔靜忽感書生無爲而至告云善解抄
經韻遂乃安於石室立靜書之旦入暮出深怪其行未盈一旬
七軸得了將以禮覲目前不見乃遭賊抄藏經巖窟世靜往收
乃委於林下箱襍久爛而卷色如初感驗奇異率此類也以貞
觀十六年端坐終於西河之平遙山春秋六十餘矣

高陽縣志

于法蘭高陽人少有異操十五出家便以精懃爲業研諷經典
以日兼夜求法問道必在眾先迄在冠年風神秀逸性好山泉
多處巖壑嘗於冬月在山冰雪甚厲時有一虎來入蘭房蘭神
色無忤虎亦甚馴至明旦雪止方去山中神祇常來受法後聞

江東山川剡縣最奇乃徐步東甌遠矚嵎嵎居於石城山足今之元華寺也居剡少時愴然歎曰大法雖興經道多闕若一聞圓教夕死可也乃遠適西域欲求異聞至交州遇疾終於象林

高陽縣志

柏巖禪師號明哲與賈島相善世居曲陽嫌薄村父米慶母顏氏慶有五子禪師其四子也自幼聰穎過人樂修靜土業遂請命於父父許之卽就柏巖祝髮爲行最苦能參四大五蘊之奧且博極羣書竟爲沙門傑出其題柏巖寺詩曰野寺絕依念空山會徧行老來披衲重病起讀經生乞食嫌村遠尋溪乃路平多年柏巖住不記柏巖名

唐縣志

羅喬羅道成宋慶厯中遊恆嶽題詩云白驪代步若奔雲聞人所至留詩迹欲知名姓問源流請看郴陽山下石後聞鄉人言

昔有真人得道乘白驪行石壁上喬從之學道年八十益壯與

羅道成隱於唐縣山中後人呼其山曰羅喬山

舊志

田志亨蠡吾人性至孝父母亡負土築墓以石鑿曾祖考妣像晨夕禮事一人捨妻子爲黃冠師李先生學老子法道業寢高從雞水於唐縣卜磨巖而居焉日乞食村落暮宿於石夜有猿猱蛇虎魑魅魍魎張吻切齒而來亨視之若無邑人異之相與鳩材構屋戶外之屨常滿年八十風骨強健號通真子

舊志

郝仙姑安州人幼時癡憨若無知者蓬頭跣足父母早亡兄嫂惡之嘗有一丐者病顛垢污藍縷人不敢近直造女所索水飲女敬與之兄嫂見之怒女猶禮待之與藥數粒女吞之有雲起乘而去莫知所終今廟祀祭頭村

舊志

清河不知所從來遼天慶間卓錫於黃金臺院外相如癡內明

而行潔里人王諫實爲功德主一日有大光明出於其室得舍利一粒圓明異常有雲中沙門客易者以州郡勢奉迎舍利於易而事之將竊以逃其夕舍利自還王氏家光明踰前遠近驚異會清河僧卒於舍利同塔於臺之西南隅

定興縣志

金董志平字道衡完縣人家世農業年十九求邱真人教以全真秘語傳之鐵冠隨身雲蹤鶴跡賜號通真以醮感鶴以神應夢水蕩神扶仙靈懷玉一日疾不時不言惟出手番一覆二指空喻十五日上昇也至日薰沐跣趺而坐出頌示人曰性似團圓月光華照影清自從雲歛後何處不分明頌畢而逝度眾三百五十餘徒年七十九歲

舊志

蔡真人滿城人母王氏感夢而生六歲始能言七歲出家戒行嚴甚金大安初聞邱真人卽恭詣之口授其訣遂得悟焉元帥

張柔領軍治滿城以狀奏之賜真人湛然江月之號丁酉歲五十
九告弟子曰苦塵俗殆將歸矣翌日具衣冠端然而逝不雲
而雪樹木皆掛比葬有鶴翱翔人以爲仙去有江月集行於世

舊志

僧智通不知何方人也盛暑破衲杖而行大定間至新城縣板
築里時承諫家見其子立愛卽日此兒當大顯貴善養之言訖
出門無迹人以爲異後立愛果登第仕至中書令封開封郡王
同上

通辨雄縣人七歲慕浮屠法禮真空爲師皇慶初萬山和尚奉
旨大作齋會請師演法忽從法座放大光明良久方滅及示寂

白光四達得舍利無數

大清一統志

苑至果號悟眞子滿城賢臺村人生而質樸不混流俗結菴於

唐縣葛洪山禮江月蔡師密授元微之旨採薇而食斲木而衣至元十三年年九十矣一日浴更新衣謂眾曰酉刻吾必去遂作頌曰來而空手來去而空手去一腳踏虛空卻返蓬萊路又作頌別眾曰人間九十年歸去塵緣斷雖有戀眾心恐失朝元伴時及酉初刻儼然端坐拈筆書一詩曰九十年來瘦鶴姿紅鉛黑水煉多時塵凡懵懂誰人識飛上青空任所之書罷而逝

舊志

劉道秀安肅人生知謀道年二十三入盤谿山禮和光道人爲師後歸省見村人暴死又軍市川劉氏妻暴死皆給符立活寓涇陽有盜二十餘人謀夜劫居停家秀知之遽使大風歛起盜因迷失潰去其靈異多類此年六十無疾而逝

舊志

馮志良字延眞山西長子縣人幼失恃怙徙遂州師神霄公主

張君又禮權教悟元寂照真人得鍊心法隱於州西象山之龍
堂數年後徙居鄰山之班姬廟又數年晝止一殮夜則忘寐州
龍里人延之作龍祥觀復請營清微觀觀成令其徒主之而去

莫知所終

安肅
縣志

張士元安肅人專門醫術累積陰德雖盜賊亦慕義請罪遇兵
火能保全身家後不知所終

安肅
縣志

僧德寶德興府關南堡人髻鬣不混童戲心慕空門禮房山瑞
峯寺青公爲師戒行精嚴行詣定興縣相蓋里見其山水清秀
卽興棲神之念於是眠沙伏草冒雨披霜經歷數載邑人聞之
大小敬禮擔籠負土供糜獻餉者恆滿於道山門正殿金仙神
像不日而成

舊
志

周姑號純風子了道於三仙洞朝廷宣詔封爲純風圓妙慈德

真人以告來者癸丑八月初二日亥時昇仙去口占示門眾曰
純風七十一老周通天徹地恣追遊而今了卻人間事萬劫仙
班出土邱又曰平生只落自在出入往還無礙今日颺下皮囊
蕩蕩起於三界又曰永出陰陽殼逍遙離世塵一性朝元去獨
步赴蓬瀛

唐縣志

保定老姑居唐縣葛洪山西南隅嘗謂人曰吾在世二百年矣
遂投崖下不墮飛昇而去後人名其崖曰捨身崖又曰老姑崖

大清

一統志

糕糜先生楊道士元末人行醫老至柳山乃曰吾姓楊山名柳
以楊遇柳吾宜居焉往來山前後施藥濟人尋卒葬山巔時人
思之爲建塔塑像迄今有疾者持糕糜懇拜用紙展案上閉戶
良久卽施藥焉香類腦麝服之屢驗俗號糕糜先生

舊志